

周氏醫學叢書 第一冊

亥21
93-1
1

亥 21
93
共 72 冊



周氏醫學
鼓書

宣統三年秋十月海昌朱允華題



清史列傳

周學海字澂之安徽建德人總督馥子光緒十八年進士內閣中書官至浙江候補道潛心醫學論脈尤詳著脈義簡摩脈簡補義診家直訣辨脈平脈章句引申舊說參以實驗多心得之言博覽羣籍實事求是不取依託附會慕宋人之善悟故於史堪張元素劉完素滑壽及近世葉桂諸家書皆有評注自言於清一代名醫服膺張璐葉桂兩家證治每取璐說蓋其學頗與相近宦游江淮間時爲人療治常病不異人遇疑難輒有奇效刻古醫書十二種所據多宋元舊槧藏家祕笈校勘精審世稱善本云

影印周氏醫學叢書序

大先兄澂之觀察生而好學自幼入塾沈酣經史詞章之學
口不絕吟手不停披往往寒不思衣飢不思食中年以後積
勞多病時醫每至束手乃發奮專攻醫學取皇帝內經日夜
研求豁然貫通若有神助繼則遍閱歷代名醫著作于仲景
傷寒論王氏脈訣諸書尤有心得凡前人有未發明者或有
誤解者皆一一闡明而糾正之晚年乃舉所屬藁手訂成編
並取古書之最重要者如神農本草經王叔和脈經精爲校
刊以餉後學蓋積三十年之精力乃得觀成而吾兄之心血
亦瘁于斯矣故未周甲而逝生平淡于名利雖承先公貴顯
之後而布衣蔬食其刻苦有非寒士所能及者乙酉膺拔萃

戊子舉于鄉壬辰成進士就內閣中書截取同知分南河歷
任揚軍廳兼管河務趨公所至皆以書簾自隨丹鉛滿几寢
餽不輟自僚友以至齊民遇奇險之症踵門求診無不應手
輒驗故一時頌聲著于大江南北民國修清史採訪輿論爲
著列傳以表彰之顧其書卷帙繁重郵筒不便是以四方同
志每苦無從覓寄今用影印縮爲袖珍本分贈各省圖書館
並寄南北各書坊發行以廣流傳俾讀者知中國醫學爲數
千年神聖相傳之精微迥出尋常技術之上而吾兄生平闡
明醫理以餉後學之志亦可告慰矣書既印成爰志其原委
于此中華二十五年十一月至德周學熙

福雙館版
慧脩壓



南京中医药大学图书馆版权所有

神農本草經



南京中医药大学图书馆版权所有

光緒辛卯仲秋
池陽周氏校刊



南京中医药大学图书馆版权所有

本艸經序

記曰醫不三世不服其藥鄭康成曰慎物齊也孔沖遠
引舊說云三世者一曰黃帝鍼灸二曰神農本艸三曰
素女脈訣康成周禮注亦曰五藥艸木蟲石穀也其治
合之齊則存乎神農子儀之術是禮記注所謂慎物齊
者猶言治合之齊指本艸諸書而言也沖遠既引舊說
復疑其非鄭義過矣漢書引本艸方術而藝文志闕載
賈公彥引中經簿有子儀本艸經一卷不言出於神農
至隋經籍志始載神農本艸經三卷與今分上中下三
品者相合當屬漢以來舊本隋志又載雷公本艸集注
四卷蔡邕本艸七卷今俱不傳自別錄以後累有損益

升降隨時條記或傳合本文不相別白据陸元朗經典
釋文所引則經文與名醫所附益者合併爲一其來舊
矣孫君伯淵偕其從子因大觀本艸黑白字書釐正神
農本經三卷又据太平御覽引經云生山谷生川澤者
定爲本文其有預章朱崖常山奉高郡縣名者定爲後
人羣入釋本艸者以吳普本爲最古散見於諸書徵引
者綴集之以補大觀本所未備疏通古義系以攷證非
澹雅之才沈鬱之思未易爲此也古者協陰陽之和宣
羸縮之節凡夫含聲負氣以及倒生旁達蠓飛蠕動之
倫胥盡其性遇物能名以達於利用生生之具儒者宜
致思焉淮南王書曰地黃主屬骨而甘艸主生肉之藥

也又曰大戟去水亭厯愈張用之不節乃反爲病論衡
曰治風用風治熱用熱治邊用蜜丹潛夫論曰治疾當
真人參反得支羅服當得麥門冬反蒸橫麥已而不識
真合而服之病以浸劇斯皆神農之緒言惟其贍涉者
博故引類比方悉符藥論後儒或忽爲方技家言漁獵
所及又是末師而非往古甚至經典所載鳥獸艸木亦
輾轉而昧其名不已僣乎後漢書華佗傳吳普從佗學
依準佗療多所全濟佗以五禽之戲別傳又載魏明帝
使普爲禽戲普以其法語諸醫疑其方術相傳別有奇
文異數今觀普所釋本艸則神農黃帝岐伯雷公桐君
醫和扁鵲以及後代名醫之說靡不賅載則其多所全

濟由於稽考之勤比驗之密而非必別有其奇文異數
信乎非讀三世書者不可服其藥也世俗所傳黃帝神
農扁鵲之書多爲後人竄易余願得夫閱覽博物者爲
之是正也因孫君伯仲校定本艸而發其端至其書考
證精審則讀者宜自得之餘姚邵晉涵序

本艸經序

儒者不必以醫名而知醫之理則莫過於儒者春秋時和與緩神于醫者也其通周易辨皿蟲之義醫也而實儒也世之言醫者必首推神農然使神農非與太乙遊則其傳不正非作赭鞭鉤銅巡五岳四瀆則其識不廣非以土地所生萬千類驗其能治與否則其業不神傳不正識不廣業不神雖日取玉石艸木禽獸蟲魚米穀之屬悉試之親嘗之亦僅與商賈市販等耳於醫乎何與吾故曰神農千古之大儒也

卷五臟論一卷皆繫之神農其本久不傳傳之者神農

本艸經耳而亦無專本唐審元裒輯之書錄解題謂之

大觀本艸讀書志謂之證類本艸厥後繆希雍有疏廬
之頤有乘雅半偈皆以本經爲之主然或參以臆說或
益以衍斷解愈紛義愈晦未有考核精審卓然有所發
明者則證古難證古而折衷于至是爲尤難孫淵如觀
察偕其從子鳳卿輯神農本艸經三卷于吳晉名醫外
益以說文爾雅廣雅淮南子抱樸子諸書不列古方不
論脈證而古聖殷殷治世之意燦然如列眉孔子曰多
識于鳥獸艸木之名又曰致知在格物則是書也非徒
醫家之書而實儒家之書也其遠勝于希雍之頤諸人
也固宜或以本艸之名始見漢書平帝紀樓護傳幾有
疑于本艸經者然神農始嘗百艸始有醫藥見于三皇

紀矣因三百六十五種注釋爲七卷見于陶隱居別錄
矣增一百十四種廣爲二十卷唐本艸宗之增一百三
十三種孟昶復加釐定蜀本艸又宗之至郡縣本屬後
人所附益經但云生山谷生川澤耳洪範以康寧爲福
雅頌稱壽考萬年又何疑于久服輕身延年爲後世方
士之說者大抵儒者之嗜學如醫然淵源其脈也覆審
其胗視也辨邪正定是非則溫寒平熱之介也觀察方
聞綴學以鴻儒名海內求其著述者如金膏水碧之珍
鳳卿好博聞妍丹吮墨日以儒爲事則上溯之義皇以
前數千年如一日非嗜之專且久而能然耶顧吾獨怪
是編中無所謂治書癖者安得起神農而一問之嘉慶

四年太歲在己未冬十月望日宣城張炯譔於瞻園之
灌木莊



南京中醫藥大學圖書館版權所有

本艸經序

神農本艸經三卷所傳白字書見大觀本艸按嘉祐補注序云所謂神農本經者以朱字名醫因神農舊條而有增補者以墨字間於朱字開寶重定序云舊經三卷世所流傳名醫別錄互爲編纂至梁貞白先生陶宏景乃以別錄參其本經朱墨雜書時謂明白据此則宋所傳黑白字書實陶宏景手書之本自梁以前神農黃帝岐伯雷公扁鵲各有成書魏吳普見之故其說藥性主治各家殊異後人纂爲一書然猶有旁注或朱墨字之別本經之文以是不亂舊說本艸之名僅見漢書平帝紀及樓護傳子按藝文志有神農黃帝食藥七卷今本